

IKOT MBET JESUS
Matthew 4:12-25; John 1:35-51; Luke 5:27-32
ỌYỌHỌ UKPEP-ŃKPỌ 18 – Eke Ikọ Owo

IKỌ IBUOT: “**Ńkedige ndikot ndinen owo, edi ńkedi ndikot mme idiok owo, nte ekabare esit**” (Luke 5:32).

I Akpa Edisobo Jesus Ye Mbet Esie

1. Ikọ ntiense John oduok owo mmọn emi emenere Jesus owut mbet, John 1:35, 36; Psalm 107:2; Matthew 10:32
2. Mbet ke ekopde ikọ John, etiene Jesus, John 1:37; 10:27
3. Etop emi Ọbọn ọnọde mbon esit ọbiọn, John 1:38, 39; Isaiah 55:1; Eriyarare 22:17
4. Edisobo Peter ye Jesus, John 1:40-42; James 5:20
5. Ikot Jesus emi okosimde Philip ama ada Nathanael ọsok Christ, John 1:43-46; Daniel 12:3
6. Eriyarare Jesus nte Eyen Abasi emen eyighe Nathanael efep, John 1:47-51; Psalm 32:2; Eriyarare 14:5

II Jesus Ọkpọn Judea Oduk Ke Galilee

7. Ukpuhọre emi akadade itie ke ini mkpọkọbi John, Matthew 4:12; Luke 3:19, 20
8. Esin Nazareth, Matthew 4:13; Luke 4:28-30; Mark 6:3-6
9. Emek Capernaum ye utom eke odude do, Matthew 4:13; 8:5; 11:22-24
10. Ntiń-nnim ikọ Isaiah osu, Matthew 4:14-17; Isaiah 9:1, 2; 2 Ńwed Timothy 3:16

III Ediyere Ikot

11. Peter ye Andrew, Matthew 4:18-20; Mark 1:16-18; 10:28-30; James 2:5
12. James ye John ke ndo-ndo oro enyime, Matthew 4:21, 22; Utom Mme Apostle 26:16-19; Luke 19:6
13. Utibe ukwọrikọ Abasi ke kpukpru mme idut, Matthew 4:23-25; 11:28
14. Ikot emi enọde Matthew, Luke 5:27-32; Ezekiel 33:11; Eriyarare 3:20.

SE EKPEPDE EBAŃA

Ke Isaiah 43:10, imokut mme ikọ emi “Jehovah ọdọhọ, ete, Mbufo edi ntiense mi, ye owo emi ńkemekde.” John eketie ntiense ọnọ Abasi ke ini enye eketińde utibe ikọ ntiense emi “Sese, Eyen-erọn Abasi!” Sia eketińde ke nda-usuń Edisana Spirit, nte kpukpru nti ikọ ntiense enyenede ndidi, enye ekemenere Christ owut mbet esie. Mmọ ebọ ifiok (Mme Ńke 10:31), enyuń etiene Jesus. Jesus ama okut udọn esit mmọ, ndien ke ndo-ndo oro Enye ọsọsọ ọnọ ọkpọsọn ikot ete “Etiene Mi;” emi ama ọsuhọre oduk ke ọwọn-esit mmọ. Edisobo ye “Eyen-erọn Abasi” emi akadade itie ama enem Andrew esit eti eti (Psalm 34:8), ndien ke ndo-ndo oro enye okot Peter onyuń etiń ikọ ntiense abańa Ọbọn. Toto ke eset, owo ekededi emi osobode ye eti-mbuk eke Eyen Abasi, esiyom mmọ efen man enye etiń mbuk idaresit emi ọnọ mmọ. Ntem ke ekeda Peter esok Christ. Nnyin ifiokke se Peter eketińde, edi Jesus okokot enye Cephas, emi ke usem Hebrew ọwọrọde itiat.

Philip ńko, ke enye ama okosobo ye ata Uńwana (Isaiah 9:2), ama ọtọnọ ndinam se mbet eken ekenamde, oro edi ndida mmọ efen ndi. Abasi oyom ikot Esie eyama enọ Enye ke isọn (Luke 8:16; Matthew 5:14). Ntem ema enọ Nathanael etop emi, kpa owo emi ekenyenede esit akpanikọ emi anamde owo odot ndinyene ebuana ye Jesus. Ke ndo-ndo oro enye ọfiokde ete ke Owo emi adade enye ke iso edi Enye emi Moses eketińde abańa (Genesis 3:15; 22:18; Deuteronomy 18:15); emi mme Anditiń ntiń-nnim ikọ ekenyuń etińde ebańa (Isaiah 7:14; 53:1-12; Jeremiah 23:5; Micah 5:2; Malachi 3:1), enye ama onyime usọp usọp (Luke 24:45).

Jesus ọkọkpọn Nazareth koro obio oro mikonimke Enye ke akpanikọ. Mbio obio oro ema eneni enyuń efańa enyuń edọhọ ete, “Nte Enye idighe eyen anam-usọ?” Akananam owo idaha ifiok esie ibe ke inua-otop pearl (Mme Ńke 3:5). Mbon esit akpanikọ ema enyime enyuń ebọhọ, ke ini ekesinde mmọ emi mikenyeneke mbuotidem (Mme Hebrew 11:6).

Ntiń-nnim ikọ emi okosude, emi ikutde ke Isaiah ibuot 9, ufań 1 ye 2, emi ekewetde ke isua 700 mbemiso Christ edimana, etiń ńkpọ otuk ekim eke Spirit.

Akamba ubiọn utom esitiene edikop eti-mbuk, koro ke usen ikpe, mme ńkpọ oro ewetde ke mme ńwed edikpe ikpe mme owo (John 12:48; Eriyarare 20:12, 15).

Etop Christ, “Ekabare esit; koro obio ubọn Heaven ke ekpere,” otiń anyan ubok owut usuń erinyańa. Ikọ emi “**Ekabare esit,**” ke adianade ye **Obio Ubọn Abasi,** owut se eyomde ye se anade enyene mbemiso ebe eduk

ke obio uboñ oro. Obio uboñ emi ke ñkañ kiet odu ke esit idem, ke ñkañ eken edi ntiñ-nnim ikọ emi ediwoṛode owut idem ke isoñ. Sia Edidem ama okodu, Obio uboñ, ekpere.

Ke ndikot Peter ye Andrew, Christ eketiñ mme ikọ emi mme andikop ekenyenede ndifiok se owoṛode. “Etiene mi, ndien nyenam mbufo edi mme okọ owo.” Etop Eti-mbuk idighe se idibede ke otu mmọ eke enyenede eti ibuot, edi “mbon isañ, idem mme anana ibuot, ididuehe” (Isaiah 35:8). James ye John ñko ema ekop, emi onyuñ eñyik mmọ nditiene Jesus.

Matthew emi ekotde Levi, ekedi owo publican, obo-utomo, kiet ke otu mmọ emi mbon Rome, mbon Greek ye mme Jew mikamaha. Mme Jew ema esua mmọ akpan-akpan, mmọ ñko ekesida mme obo-utomo nnọ mme andikara nte mbon etabi obio mmọ. Edi Matthew ama okpoñ kpukpru onyuñ ayak ofuri itie utom esie ye se idude ke esit etiene Christ. Baba owo kiet inyeneke ntak-urua ke eyerede oruk ikot ntem (Matthew 17:24-27; Mark 10:28-30).

Mmọ emi ekekotde, enyuñ emekde, kpa mme anam akpanikọ ekedi mmọ emi ekenyenede ndika iso ke utom ke ini Jesus ama okpoñ mmọ. Kpukpru se isimde nnyin ke emi ebe ke ubok mbet emi ekedude ye Christ. Matthew edi andiwet akpa eti-mbuk; John, oyohọ inañ. Mark ye Luke ekedi mbet ke ukperedem. Mmọ emi Oboñ ekemekde edi mme andiwet mme ñwed emi edude ke Edisana Ñwed Abasi. Paul, andiwet mme ñkpri ñwed (epistles) duopeta ke otu mme Ñwed emi edi enye emi ekekotdekot, ukem nte mbon emi ekemekde ke ini Jesus okodude ke ererimbot.

MME MBUME

1. Nso usuñ ke ekebemiso eda eduri mbet enọ Jesus?
2. Didie ke Christ akanam ye mmọ emi ekebupde mbume?
3. Didie ke mmọ emi ekabarede esit enam ye etop eti-mbuk?
4. Tiñ mme ñwoṛo-nda edu uwem Nathanael
5. Ewe ini ke Jesus akadaha okpoñ Nazareth?
6. Nso ikanam Christ adaha okpoñ Nazareth?
7. Ewe ntiñ-nnim ikọ okosu ke ntak ukpuhore emi?
8. Nte ñwed itoro eke ufok ñwed nta-ifiok edi se inade enyene mbemiso ekop enyuñ efiok ikot Abasi?
9. Ke ukpep-ñkpọ nnyin mfin mbet ifañ ke ekemek?
10. Nso idi akpan ñkpọ eke odude ke mbet Jesus ndiboḥo oṭọ kiet ke eritoño utom Esie?
11. Ewe obio ke idut Palestine ke mbet duopekiet emi ekekotde eketo?
12. Ewe obio ke idut Palestine ke oyohọ mbet duopeba emi ekemekde okoto, nso ikedi enyiñ esie?